

## zuzendariari

(0034) 943 300 222

**OHARRA:** Ahalik eta iritzi gehienek izan dezaten tokia, ez da komeni makinazko 15 lerro baino luzeago idaztea gutun hauetan. Idatzi duenaren izena, telefonoa, helbidea eta NAren zenbakia agertu beharko dira. Laburtu behar izanez gero, zuzendaritzak bere esku du horretarako eskubidea. Erdaraz iristen diren gutunak ez dira argitaratuko.



zuzendariari@egunkaria.com



Gudarien etorbidea, z/g 20140 Andoain

## Inertziak apurtu, 13an Zarautzera

Pedro Zuberogoitia, Nagore Zuazo eta Josu Elizondo • DEUSTU

Orokorrean azkeneko urteetan herri mugimenduetako kideengan antzematen diren ezaugarriak nabarmenenak nekea eta ilusiorik eza dira. Nazio borrokan zein gatazka sozialetan ezker eraldatzaileak erakusten duen ezintasuna ikusirik, hamaika dira indarrak eta astia arlo pribatura bideratu dituztenak. Guk geuk ere hainbat asmo genituen datorren zubirako, zein baino zein erakargarriagoa, baina Zarauzko jardunaldien berria heldu zitzaigunean argi ikusi genuen izan behar ginela. Saramagok dioen bezala, «gutako bakoitzak egin dezakeena oso gutxi da, baina apurtxo hori ez egitea

barkaezina litzateke». Duela hilabete Zuzen Ekintza Taldeak Tuterako ekintza bikainaren ostean plazaratutako idatziaren pasarte batzuek etorkizunean desobediencia esparrutik jorratu ahal diren ildo berrien erakusle ezin hobea izan daitezke. Hona hemen, bada, ekintzaileen berbak:

Jarduerak: publikoak, ez bortitzak, bate-ratzaileak eta erakargarriak. Izaera: aldarrikatzen ditugun giza eta herrien eskubideak zorrotz errespetatzeak gu geu izaten lagundu gaitu; taldea estrategia politiko-zibilaren aldekoa da. Bidea eraiki: gizarte-ari tresna berri bat eskaini askatasunean, elkartzasunean, burujabetzan, konfiantzan, laguntasunean eta aniztasunean oinarrituta. Lorpenak: urratsez urrats lortuko ditugu, epe motzean, ertainean eta luzean lan eginez.

Deialdia eginda dago, orain gure esku gertatzen da ahalik eta jende gehien biltzea Zarautzen.

## Ibarretxe jaunari eta EAJko bozeramaileei

Estefania Herrador-Martinez (*Alarde mistoen aldeko taldearen izenean*)

Inbestidura hitzaldian, emakumeen benetako integrazioa gobernu berriaren helburuetako bat izango dela esan digu Ibarretxe jaunak. Politikagintzan, lan munduan edota sozial arloan emakumeen parte-hartzea areagotuko duela iragarri digu lehendakari jaunak. Jadanik sei urte luze iragan dira eta auzitegi-tako epaiek beren alde egin arren, Hondarribia eta Irungo emakumeek beren

herriko jaietan gizonen parekoak izan ezin jarraitzen dute. Urtero, amarru batzuk aitzakiatzat hartuta, berdintasuna ukatzen zaie. Beren utzikeria justifikatzeko, korapilo hau askatzeko eskuduntza duten politikariek tokiko arazoa dela esaten digute. Sinesten al dute eskubideen urraketa tokiko problematxoa dela? Uste ote dute oinarriko eskubideek boto edo gehiengoan menpean egon behar dutela? Izatez, eskubideak guztion gozamenetarako dira, edonork aldarrika dezakeen ondarea. Ordua da Ibarretxe jaunari eta EAJko bozeramaile zarenten horiek, ordua da urte luzeak iraun duen gatazka hau konpontzeko! Hitzetik ekintzara pasatzeko garaia da eta beren herrietan arrotzak, baztertuak eta irainduak diren hondarribiar eta irundar horien eskubideak babesteko.

## montxo



## galdeiozu... ?



**SILBIA SARASOLA**

Realeko zuzendaritzako kidea

## Zein neurri hartu beharko lirateke jendeak Reala bultzatzeko?

Jon Ruiz (Donostia)

Realeko zaleek momentu txarrenetan ere taldearekin daudela frogatu dute. Betidanik esan ohi da taldearen 12. jokalaria zaleak direla, eta hori gaur ere horrela da. Nolanahi ere, jendeak Reala bultzatzeko hainbat neurri har daitezke, eta gu horretan ari gara lanean: Anoetako zelaian animazio sistema berriak jarri ditugu martxan (animazio tresnak, megafonia...), partida garrantzitsuetan zaleek etxetik kanpo jokatzeko diren norgehiagoketara joateko zenbait ekimen egin ditugu, beste batzuetan sarreraren prezioa merkatu dugu, zelaira ahalik eta jende gehien etor dadin. Gauzak horrela, lerro hauek aprobetxatu nahi nituzke jendea animatzeko eta ilusioa gal ez dezala eskatzeko.

Urriaren 16tik aurrera **Maria Jesus Aranda • Nafarroako Arartekoa** izango da Galdeiozu ataleko gonbidatua. Bidali zure galderak ordurako.

## hirusta



Aitziber Perez de Karkamo

## Egunero da urriaren 12a

**K**otxea hartuta etxerantz abiatu da, minutu eskasetan lagunekin bilduta egongo dena jakitearen sentsazio atseginaz. Irratia piztuta, mundua astintzen ari diren Afganistanen kontrako eraso militarren azken ordua entzun du eta ironikoa iruditzen zaio misilak jaurti ostean laguntza humanitarioa botatzen duten hegazkinen berri entzutea. Pakistanera bidali duten berri-emailearen agurra entzutearekin batera, aurrean duenaz ohartu da eta abiadura jaitsi behar izan du, gelditzeko agindu dion agenteari begirada kendu barik. «Jarri berria dute kontrola eta neu izan behar lehena!» Kotxea bide bazterrean utzita, autotik irterera behartu eta mendira begira eman du autoaren miaketak iraun duen ordu erdi luzea, eta horren lekuko izateko eskubidea duela esan duenean barre algaraka hasi zaio agentea, datuak konprobatzen dituen bitartean. Hiru ordu laurden iraun dute tramite denek eta paradoxikoa irudi-

tu zaio Guardia Zibil gazteenaren agurra: «Mila esker kolaborazioagatik; egun on pasa».

Ekin dio bidaiari, sentitzen duen amorruak sentitutako ikara gaindi dezala desiraturaz. Auto-ko irratiak piztuta dirau eta ironikoa iruditzen zaio Arafatek balizko su-etenen inguruan egindako adierazpenak, su-etenen deia hausten duten palestinarren atxilotuko dituela iragarritz egin dituenak. Irratiko esatariak kirol albisteei heldu dienean iritsi da auzoko parkera eta orduan jaso du amaren deia. Sakelako telefonotik amaren ahots negatiak «zure arreba atxilotu dute» esan dio, «Guardia Zibilak eraman du». Etxera joan da ahalik eta lasterren eta han topatu duen amaren begietan irakurri du dena, orain hamar urte torturatua izan zen amaren kezka, alaba bera torturatu zutenen esku dagoenean. «Inkomunikatuta dago. Ostiralean igaroko da epailearen aurretik». Urriaren 12an; egunero baita urriaren 12a.